

**ጳውሎስ
ፕሊጲስቶስ አሳስ
ፃፊ ዜታ
ጊዶ ቆፋ**

ጳውሎስ ሃ ኪታዛ ፃፊዳይ ማቂዶኒያ ጌቴቴዛ አሮሜ ካዎይ ሃሪዛሶን ዲዛ ፕሊጲስቶስ ጌቴቴዛ ደሬን ዲዛ ዎሳ ኬሳይሳ። ሄና ሄ ዎሳ ኬሳይ ጳውሎስ ኮይሮ አወርፓን ኤሲዳ ዎሳ ኬሳ። ፕሊጲስቶስ ካታማን ዲዛ አሳፔ ዳሪዛ ባጋይ አሮሜ ቢታፌ ዩዳ። ሄሳፌ ዴንዲዳይሳን ዳሮቴ ኦቶሬቴቴስ። (ሃዋ 16:21) ኢስታፌ ባጋቴ ኪርስቶሳን አማኒዛይታ። ሄሳ ጊሽ ባ አሳታን ኢዳቴዳይታኔ ንዴቴዛይታ ጊዲዳ። ሄሲካ ኢስቲ ሃ አላሜ ዱሳን ማንቆ ጊዳና ማላ አሲዴስ። (2ቆሮ 8:2) ጊዲዳኮካ ኢስቲ አማኖን ሚኒ ኤቂዲ ሃንኮ አማኒሽ ዋዩቴዛይታ ማዲዛይታ ጊዲዳ። ሄሳ ጋሶን ጳውሎስ ኢስታ አዴፌ ሲቀስ።

ሃ ኪታይ ፃፊቴዳይ ጳውሎስ ቃሾሶን ዲሺን ሃንኮ አማኒዛ አሳንቻታፔ ኤቂቴሳ ኢዛ ጋኪን ፕሊጲስቶሳን ዲዛ ዎሳ ኬሳይ ጋርሳን ዴንዲዳ ዎርዶ ቴሚርቴ ጋሶን ኢዛ ዎዝናይ ሜቂ ዲሺና። ጊዶ አቲን ሃ ኪታዛን ቆንጩ ቤቴዛይ ኡፋይሲኔ ኩሜሳ አማኔቴስ። ጳውሎስ ሄሳ ሄ ኪታዛ ፃፊዳ ጋሶይ ኢዚ ሜቶቴ ዲሺን ፕሊጲስኔ አማኒዛ አሳይ ኢዛስ ማዶ ዩዲዳ ጊሽ ኢስታ ጋላታናሲኮ! ኢዛ ቦላ ጊዲን ዎይኮ ኢስታ ቦላ ዱማ ዱማ ሜቶቴ ጋኪኮካ ኢስታስ ዳሮ ፃላቴሳኒኔ ኩሜሳ ሚኖ አማኖይ ኢስታስ ዳና ማላ ኢዚ ኢስታ ሚንሴሴስ። ኦቶሬቴሳኒኔ ጩቂቴሳ አጊዲ ዩሱስ ኪርስቶሳ አሺኬቴሳን ኩማና ማላ ኢዚ ኢስታ ሚንሴ ቆፊሴስ። ኢስቲ ዩሱስ ኪርስቶሳራ አያናን ኢሲኖ ጊዲዲ ዴሚዳ ዴዎዚ ዎሳ ኪያቴሳፌ ቤቴዳይሳኒ ኢስቲ አማኖን ኤኪዳይሳፌ አቲን ዎጋ ናጎን ቤቴዳይሳ ጊዴና ጊዲ ኢዚ ኢስታ ቆፊሴስ። ዩሱስ ኪርስቶሳራ ኢሲፌቴሳን ዲዛ ኡባታስ ዎሲ ኢስታስ ኢሚዛ ሳሮቴሳ ጊሺኔ ኡፋይሳ ጊሺካ ፃፊዴስ።

ሃይሲ ሃ ኪታዚ ኤሬቴዛይ ኡፋይሲ፣ አማኔቴስ፣ ኢሲፌቴሳኒኔ አማኖን ዴዎን ሚኒ ኤቃና ማላ ቆንጩሲ ቤሲዛይሳና። ቃሴካ ሃዋሬ ጳውሎስ ፕሊጲስቶስ ዎሳ ኬሳዮ ዳሮ ሲቂዛይሳ ቆንጩሴስ።

ሃ ማፃፋይ አይኪዳ ኩሜሳ ቆፋ
ጌሎሶ 1:1-11

- ጳውሎስ ዱሳ ጊሽ 1:12-26
- አማኖን ዱሳስ ሌሚሶ 1:27-2:18
- ዊምቶሳኔ አፍሮዲዎ ቆፋ 2:19-30
- አማኖ ኢዊዛይታፔ ናጌታና ማላ ዮቶ 3:1-4:9
- ጳውሎሲ ፕሊ.ጲ.ሲ.ዮ.ሳን አማኒዛይታስ ሺሺዳ ጋላታኔ ዞሬ 4:10-20
- ኩሻ ቆፋ 4:21-23

1 ዮሱስ ኪርስቶስ አሳንቻ ጊዲዳ ጳውሎሳፔኔ ዊምቶሳፔ ዎሳ ኬላ ጩማታራኔ ዳቆኔታራ ኢሲፌ ፕሊ.ጲ.ሲ.ዮ.ሴ ዴሬን ዲዛ አማኒዛይታስ ዮሱስ ኪርስቶስ ዱማቲዳይታስ ኡባስ፤ * 2 ኑ አዎ ያሳፌ፥ ጎዳ ዮሱስ ኪርስቶስ ኪያቴላኔ ሳሮቴላ ኢንቴስ ጊዶ።

ጋላታ ዎሳ

3 ኢንቴና ቆጥዛ ኡባ ጋላስ ታኒ ታ ያሳ ጋላታይስ። 4 ኡባ ጋላስ ኢንቴ ጊሽ ታ ዎሲዛ ዎዴ ኡፋይሳን ዎሳይስ። 5 ኮይሮ ጋላሳፌ ሃ ሲሚን ሃኖ ጋካናስ ሚሺራቾ ቃላ አሶን ኢንቴ ታናራ ዴታ። 6 ኢንቴናን ሎዎ አሶ ዶሚዳይሲ ኢዚ ዮሱስ ኪርስቶሲ ወርሴላ ፐርዳስ ያና ጋካናስ ኢንቴና ዳንዳይሳናይሳ ታ አማናይስ።

7 ታ ሃዲ ቃሾ ኬላን ዲሺኒኔ ታ ቃሼታናፔካ ካሴ ሚሺራቾ ቃላ ቱማ ናጋናሲኔ ሚንጴሳናስ ያሲ ታስ ባ ኪያቴላን ኢሚዳ ማዶን ኢንቴ ወሪካ ታናራ ኢሲፌ አሲዳይታ ጊዲዳ ጊሽ ኢንቴ ኡባ ጋላስ ታ ዎዝናፔ ዳዮኬታ። ሄሳ ጊሽ ታ ኢንቴ ጊሽ ቆፓናስ ታስ ቤሴስ። 8 ታ ኢንቴና ዮሱስ ኪርስቶስ ሲቆን ዎስታ ላሞቲዛኮኔ ያሲ ታስ ማርካ።

9 ኢንቴ ሲቆይ ኤራቴሳኒኔ አኬካን ኬሂ ዳራና ማላ ታ ዎሳይስ። 10 ሄሲካ ኢንቴ ኡባፌ አዲዛይሳ ሻኪ ኤራና ማላኔ ዮሱስ ኪርስቶስ ዩሳ ጋላስ ጋካናስ ኢንቴ ጌሻታኔ ዎሶይ ባይንዳይታ ጊዳና ማላ ኮያይስ። 11 ያሳ ቦንቺሲዛይሳኔ ጋላቲሲዛይሳ ኢንቴ አሳና ማላ ዮሱስ ኪርስቶስን ቤቲዛ ጌሻቴላ አይፌን ኢንቴ ዎዝናይ ኩሞ።

ጳውሎስ ቃሼቴላን ሚሺራቾ ቃላ ዲቾ

12 ሃዲካ ታ ኢሻቶ! ታ ቦላ ጋኪዳ ሜቶይ ሚሺራቾ ቃላይ ካሴፔ ዳሪ አካናስ ጊዲዳይሳ ኢንቴ ኤራና ማላ ታ ኮያይስ። 13 ሄሳ ጊሽ ታ ቃሼቴላይ ኪርስቶስ ጊሽ ጊዲዳይሲ ካዎ ኬላ ዛቤታሲኔ ሃራታስካ ኤሬቲዴስ። * 14 ታ ቃሼቲዳይሳ ጌዶን አማኒዛይቲ ያሳ ቃላ ባቦንታ ዓላቴላን አሳስ ማርካታናስ ሚኖቴሳ ዴሚዳ።

* 1:1 ሃዎ 16:12 * 1:13 ሃዎ 28:30

15 ኢሲ ኢሲ አሳቲ ጮ ኑ ኢዛፔ ዋኒዶን ጌሳኒኔ ሆሎቴላን ሳባኬቴስ። ባጋይቲ ቃሴ ሎዖ ቆፋራ ኪርስቶሳ ጊሽ ሳባኬቴስ።
 16 ባጋይቲ ታ ሚሺራቾ ቃላ ጊሽ ሞቴታና ሃን ዲዛይሳ ኤሪዛ ጊሽ ሲቆን ሳባኬቴስ። 17 ሃንኮይቲ ቃሴ ሎዖ ቆፋን ጊዶንታ ታና ጋኪዳ ቃሾዛ ቦላ ሃራ ዋዬ ጋላናሲኔ ባ ኢታ ቆፋ ፖላናስ ኪርስቶሳ ሳባኬቴስ።

18 ሄሳ ጊዲኮ አይ ሜቶ ዲዛይ! ዋና አይፌ ዮዖይ ሱሬቴላን ጊዲን ዎይኮ ሚሳቲሶን ጊዲንካ አዋራካ ኪርስቶሳ ሳባኪዛ ጊሽ ታ ኡፋዬታይስ። ቃሴካ ታ ኡፋዬታና። 19 ታ ቦላ ጋኪዳ ሜቶፔ ታ አዳናይ ኢንቴ ዎሳኒኔ ዩሱስ ኪርስቶሳ አዖና ማዶን ጊዲዳይሳ ታ ኤራይስ። 20 ታ አይ አጌራካ ዩላቶንታ ማላ ሚኖ ኡፋይሲኔ ላሞታይ ታስ ዴስ። ጊዶ አቲን ካሴካ ሃቺካ፤ ታ ሃይቂንካ ፓዓ ዲንካ ኪርስቶሲ ታ አሾን ቦንቼታናይሳ ታ ዓላቴላን ሃሳዖይስ። 21 ታስ ዱስ ጉሲ ኪርስቶሳ። ሃይቆይካ ታስ ጎዓ። 22 ጊዶ አቲን ታኒ ሃይሳ አሾ ዱሳን ጉጃ ዲዛኮ አይፌ ኢሚዛ አሶ አሳይስ ጉሳ። ታ አዋይሳ ዶራናኮኔ ታስ ኤሬቴና። 23 ሃ ናምዑ ሃኖታን ሜቶቴታዲስ። ታ ባዳ ኪርስቶሳራ ዳናስ ላሞታይስ። ሄሲ ሃራ ኡባፌ ኬሂ ሎዖ። 24 ጊዶ አቲን ታስ አሾን ዱሲ ኢንቴስ ኬሂ ኮሺስ።

25 ሄሳ አኬካዳ ኢንቴ አማኖን ዲጫና ማላኔ ኡፋዬታና ማላ ኢንቴ ኡባታ ማታን ጋምዓናይሳኔ ዳናይሳ ታ ኤራይስ። 26 ታ ሄ ባዳ ኢንቴ አቻን ዴዩኮ ታ ጋሶን ኢንቴስ ኪርስቶሳን ዲዛ ጩቄቴሲ ዳራና።

27 ኪርስቶሳ ሚሺራቾ ቃላስ ቤሲዛ ማላ ዲቴ። ሄሳሶ ሃንካ ታ ኢንቴና ሄ ባዳ ቤይዳኮ ዎይኮ ሃሆን ዳዳ ኢንቴ ጊሽ ታ ሲዩዛኮ ኢንቴ ሚሺራቾ ቃላ አማኖስ ኢሲኖ አሌቲሼ ኢሲ አዖናን ኢንቴ ሚኒ ኤቅናይሳ ታ ኤራይስ። 28 አይ አጌራካ ኢንቴናራ ኤቄቴዛይታስ ሂርጎፍቴ። ሄሲ ኢስቲ ዳዖናይሳሲኔ ኢንቴ አታናይሳስ ዖሳፌ ኢሜቲዳ ማላታ። 29 ኢንቴ ኪርስቶሳ አማኒዛይታ ዓላላ ጊዶንታ ኢዛ ጊሽ ዋዬ ኤኪዛይታ ጊዳና ማላ ሃይሲ ዖሳ ኪያቴሲ ኢንቴስ ኢሜቲዴስ። 30 ኢንቴ ካሴ ቤዱዳ ማላ ሃሂካ ታ ቦላ ዲዛይሳ ኢንቴ ሲዩዛይሳ ማላ ሄሳሶ ኢንቴናካ ዋዩሶን ዴስ። *

2

አሽኬቴላ ኪርስቶሳፔ ታማሮ

* 1:30 ሃዋ 16:19-40

1-2 ኢንቴስ ኪርስቶስ ላጋራ ቤተዳ ኢሲፌቴሳ ጋሶን ኢሶይ ኢሳ ሚንጴሲዛዝ ሲቆ ጊዲንካ ዎይኮ አያና ኢሲፌቴስ ዎይኮ ማሮይኔ አሳስ ሚጼቴስ ኢንቴ ጋርሳን ዲኮ ኢንቴ አስ ሲቆን ኢሲ አያናኒኔ ኢሲ ቆፋን ጊዲዲ ታ ኡፋይስ ፖሊቴ። 3 አስ ኡባ ኢንቴፌ ቦላራ ያሊቴ አቲን ኢንቴርካ ኢንቴና ዶሶን ዎይኮ ጎዓይ ባይንዳ ጋላታ ኤካናስ ኢሲ ሚሺካ አሶፍቴ። 4 ኢንቴፌ ኢሲ ኢሲ አሲ ሃራ አስ ጎዒዛይሳ ያሊቴ አቲን ኢንቴ ጎዓ ዓላላ ያሎፍቴ።

5 ዮሱስ ኪርስቶስ ዲዛ አሽኬቴሲ ኢንቴ አቻንካ ዶ። 6 ኢዚ ኤራይስ ያሳኮሺን ባና ያሳራ ጊኒሳናስ ኮይቤና።

7 ጊዶ አቲን አይሌ ሜዳ ኤኪዲ አስ ሚሳቲዲ ባርካ ባና ኤያ አስ ኬሲዴስ። 8 አስ ጊዲ ቆንጨዲካ ባና አሳፔ ዚቃ አሲዴስ። ሃይቃና ጋካናስ ሄሲካ ማስቃሌ ቦላ ካቂቲ ሃይቃና ጋካናስ አዛዜቴዴስ። 9 ሄሳ ጊሽ ያሲ ኢዛ ዳሮ ጶቁ ሂስቲዴስ። ሱንሳ ኡባፌ ጶቁ ጊዳ ሱንስ ኢዛስ ኢሚዴስ።

10 ሄሲካ ሳሎንካ ቢታ ቦላን ቢታፌ ጋርሳንካ ዲዛ ሜዴቴሲኔ ጉልባቴይ ወሪ ዮሱሳ ሱንሳስ ጉልባታና ማላ። 11 አሳ ኢንግርሲ ወሪካ ያሳ አዋ ቦንቾስ ዮሱስ ኪርስቶሲ ጎዳ ጊዲዳይሳ ማርካታናሳ።

ዴሬ ፖዎ

12 ሄሳ ጊሽ ታ ኢሻቶ! ኢንቴ ካሴ ኡባ ዎዴ አዛዜቴዛይታ ጊዲዳ ማላ ሃዒካ ታ ማታን ዶንታ ኢንቴፌ ሃሆን ዲኮካ ኢንቴ አቴሳይ ኩሜስ ጊዳና ማላ ያሻቴሳኒኔ ቦንቾን ፖሊቴ። 13 ያሲ ኢንቴስ አዛዜቴስ ኢሚሼ ባ ቆፋ ወርሴስ ጋካናስ ኢንቴ ጊዶን አሴስ።

14 አይ ሚሺካ ዙዙንሲኔ ፓላማይ ባይንዳ አሲቴ። 15 ሄሲካ ኢንቴ ኢታኔ ጌላ አሳ ጊዶን ጌሻታኔ ዎሶይ ባይንዳ ያሳ ናይታ ጊዲዲ አላሜ ቦላ አዋ አርሼ ማላ ዴሬ ኡባስ ፖዓናሳ። * 16 ኢንቴ ኤኪዳ ዴዎ ቃላ ሎዔሲ አይኪኮ ኪርስቶሲ ሃ ሲሚ ዩዛ ዎዴ ታ ሜላ ዳቡሮንታይሳ ጊሽ ታ ጩቁታናዚ ታስ ዴስ።

17 ቃሴካ ኢንቴስ ጎዳን ዲዛ አማኖይ ኢንቴ ያሳስ ሺሻዳ ዱማ ያርሾ ማላ ታ ሺምፖይ ኢንቴ ያርሾራ ኢሲፌ ያርሾ ማላ ጉኪዛኮ ኢንቴናራ ታካ ኡፋዬታና። 18 ሄሳሶካ ኢንቴ ኢንቴስ ኡፋዬቲዲ ታናካ ኡፋይሳናስ ቤሴስ።

ዒምቶሳ ዎሳኔ አፍሮዲዎ ዎሳ

19 ጎዳይ ማዲኮ ዒምቶሳ ኢንቴኮ ዮዳዳ ኢንቴ ሎዔቴሳ ጊሽ ሎዎ ዎሬ ሲያናስ ኮያይስ። 20 ኢንቴ ሎዔቴሳ ጊሽ ቆፒዛ አሲ

* 2:15 ዛሬ 32:5

ሃራ ኢዛ ማላይ አኒካ ባዋ። ²¹ ሃራይ ወረካ ዮሱስ ኪርስቶስ ደላ ጊደንታ ባ ጎዳስ ዎዊዛይ ዓላላ። ²² ጊደ አቲን ኢንቴ ኤሪዛይላ ማላ ዊምቶሲ ኢዚ አይ ማላ አሳኮኔ ባ ጊሽ ማርካሲዴስ። ናይ ባ አዋራ አሲዛ ማላ ታናራ ሚሺራቾ ቃላ ዮቲዴስ። ²³ ሄሳ ጊሽ ሃይሳፌ ሲንሳን ታ ዋናኖኔ ሻካ ኤሪዳፕ ጉዬ ኢዛ ታ ኢንቴኮ ኪታና ቆፓይስ። ²⁴ ታካ ኢንቴኮ ማታ ዎዴ ባናይላ ጎዳን አማኔታይስ። ²⁵ ሄሳሶካ ኢንቴ ታና ኮሺዛ ሚሻን ኡባን ማዳና ማላኔ ሎዔሲ አይካና ማላ ዮዲዳ አፍርዲዎ ታ ኢንቴኮ ዛራ ዮዳና ማላ ኮሺዛይሲ ታስ ኤራቲዴስ። ²⁶ ጋሶይካ ኢዚ ኢንቴና ኩሜላታ ቤያናስ ላሞቲዳ ጊሺኔ ቃሴካ ኢንቴ ኢዛ ሳኮዛ ሲዬዳይሳስ ቆፒዳ ጊሻሳ። ²⁷ ቱማፕካ ሃርጊዲ ሃይቂሼ አቲዴስ። ጊደ አቲን ዎሲ ኢዛ ማሪዴስ። ታ ካሴ ሙዞቲዛይላ ቦላ ሃራ ሙዞይ ጉጄቶንታ ማላ ታናካ ማዲዴስ። ²⁸ ሄሳ ጊሽ ኢንቴ ኢዛ ቤይዲ ኡፋዮታና ማላኔ ታካ ሂርጋሬ ሼምፓና ማላ አሞታይስ። ²⁹ ኢንቴ ኢዛ ኬሂ ኡፋይሳን ሞኪ ኤኪቴ። ኢዛ ማላ አሳታካ ቦንቸቴ። ³⁰ ኢንቴ ታና ማታን ዲዲ አሲ ማዳናስ ዳንዳዮንታ ጊሽ ኢዚ ባ ሼምፓስ ሚሼቶንታ ታና አሲ ማዲዲ ኪርስቶስ አሶን ሃይቂሼ አቲዴስ።

3

አሾን ጩቁታናስ ቤሴና

¹ ታ ኢሻቶ! ሃይሳፌ ሃራ ታ ኢንቴና ጊዛይ ጎዳን ኡፋዮቲቴ። ሃዲካ ዛራዳ ኢዞ ታ ኢንቴስ ዓፊኮ ታና ሳሌሴና። ኢንቴናካ ጎዳና። ² ሄይታ ካና ማላ ሁስካቲዛይታፕ፣ ኢታ አሲዛይታፕኔ አሳስ ሜቄስ ሜንሲዛ አሳታፕ ናጌቲቴ። ³ ቱሙ ቃፃራቲዳይቲ፣ ዎሴ ዎሲዛይቲ፣ ዮሱስ ኪርስቶስን ጩቁዛይቲ፣ አሾን ጩቁቶንታይቲኔ አሾንካ አማኔቶንታይቲ ኑና። ⁴ ታ ጩቃና ኮይኮ አሾ ባጋራ ጩቃና ሚሺ ታስካ ዴስ። አናስካ አሾን ጩቁዛ ሚሺ ዲዛ ሚሳቲኮ ታ ኢዛፕ አዳይስ። ⁵ ታኒ ዮሌቲዳ አስፑንሳ ጋላስ ቃፃራታዲስ። ታ ኢስራዔሌ ዜሬሲኔ ቢኒያሜ ኮቻፌ ዮሌታዲስ። ኢብራዌታ ጊደን ታካ አዳ ኢብራዌ። ዎጋ ባጋራ አይቸዛዴይ ዲኮ ታ ካሴ ፋርሳዌ። * ⁶ ሙሴ ዎጋስ ዚልዔቲዛይላ ጊዲኮ ታኒ ካሴ ዎሳ ኬላ ጎዲዛዴ። ዎጋ ናንን ቤቲዛ ዊሎቴሲ ጊዲኮ ካሴ ታ ቦላ ኢሲ ዎሶይካ ዴና። * ⁷ ጊደ አቲን ታስ ጎዳ ጊዲዳይላ ኡባ ኪርስቶስ ጊሽ ጋዳ ጎዳይ ባይንዳ ሚሻ ማላ ቆዳዲስ። ⁸ ሄሳፌካ ታ ጎዳ ዮሱስ

* 3:5 አር 11:1፣ ሃዋ 23:6፣ 26:5 * 3:6 ሃዋ 8:3፣ 22:4፣ 26:9-11

ኪርስቶስ ኤሮፔ አዲዛይ ሃራይ አይኮይካ ባይንዳይሳ ታ አማኒዛ ጊሽ ኡባካ ጮ ሜላ ጎዓይ ባይንዳ ሚሻ ማላ ቆዳዲስ። ታኒ ኢዛ ጊሽ ጋዳ ኡባካ አጋዲስ። ታ ኪርስቶስ ዴማና ጋዳ ኡባ ሚሻካ ዎራ ዎዲዳ ኢታ ሚሻ ማላ ቆዳዲስ። 9 ታኒ ሄሳሶ አሲዛ ጋሶይ ካሴ ሙሴ ዎጋን ታስ ዲዛ ዒሎቴሳ አጋዳ አማኖን ቤቲዛ ያሳ ዒሎቴሳ ኪርስቶስን አማናዳ ዴማናሲኔ ታ ኢዛራ ኢሲፌ ዴጎናሳ። 10 ኪርስቶሳኔ ኢዚ ሃይቂ ዴንዲዳ ዴንሳ ዎልቃ ታ ኤራና ማላ ኢዛ ዋዩካ ታ ኢዛራ ጊሼታና ማላኔ ሃይቆንካ ታ ኢዛ ሚሳታና ማላ አዋታይስ። 11 ሄሳሶካ ታ ሃይቃ ዴንዲዳፎ ጉዩ ሜርናስ ዳናስ ኮይይስ

ወርሴስ ጋካናስ ዎሴ

12 ታ ሃይሳ ወርሳ ዴማዲስ ዎይኮ ሃይሳሶ ሃናዲስ ጉስ ጊዴና። ጊዶ አቲን ዮሱስ ኪርስቶሲ ታና ኤራይስ ሂስቲዲ ታስ ጊጊሲዳ ዎይቶ ኤካናስ ሚና ዎሳ ቦላ ዳይስ። 13 ታ ኢሻቶ! ታ ሃሲ ታ ኮዩዛይሳካ አይኪዳ ማላ ቆዲኬ። ጊዶ አቲን ታ ኢሲ ሚሺ አሳና። ታፔ ጉዩራ ዲዛይሳ አጋ አጋዳ ታፔ ሲንሳን ዲዛይሳ አይካናስ ዛራዳይስ። 14 ያሲ ታና ዮሱስ ኪርስቶስ ባጋራ ፑዴ ዒይጊዳ ጊሽ ዎይቶ ጋካ ኤካናስ ኤሌላይስ።

15 ሄሳ ጊሽ ኑኒ አማኖን ሚኒዳይቲ ወሪካ ሃኒዛ ዮዎ ወርሲ ሄሳሶ ዒላናስ ቤሴስ። ኢሲ ኢሲ ዱማ ቆፋይ ኢንቴስ ዲኮ ሄሳካ ያሲ ኢንቴስ ቆንጨሳና። 16 ጊዲኮካ ኑ ሃሲ ጋኪ ኤሪዳዛን አኔ ሲሜሬቶስ።

17 ታ ኢሻቶ! አኔ ኢንቴ ታ ሃኒዛ ማላ ታና ካሊቴኔ ሃራታራካ ኢሲፌ ዴዒቴ። ኑ ኑና ኢንቴስ ሌሚሶ ሂስቲ ቤሲዳ ማላ ዲዛ አሳታ ዎዝናን ዎሲቴ። * 18 ጋሶይካ ሃይሳፌ ካሴ ታ ኢንቴስ ዛራ ዛራ ዮቲዳ ማላ ሃሲካ ዛራዳ አፉንሳራ ኢንቴስ ዮታይስ። ዳሮቲ ኪርስቶስ ማስቃሌስ ሞርኬ ጊዲዲ ሲሜሬቴቴስ። 19 ኢስታ ወርሴስ ዳዮ። ኢስታ ኡሎይ ኢስታ ያሳ። ኢስታስ ካወሻቴሳይ ኢስታስ ቦንቾ። ኢስታ ዎዝናይ ሼምፒዳይ ሃ ቤታ ዱሳና። 20 ኑ ዴሬይ ጊዲኮ ሳሎና። ሄፔ ቡሮ ያናይሳ ኑና አሺዳ ጎዳ ዮሱስ ኪርስቶስ ዩሳ ላሞቴሳን ናጎን ዶስ። 21 ኢዚካ ወርሲ ባፔ ጋርሳን ሃሪሳና ዳንዳዩዛ ባ ዎልቃና። ዳቡራንቻ ጊዲዳ ኑ አሳቴስ ቦንቼቲዳ ባ አሳቴስ ሚሳቲሲዲ ላማና።

4

ወርሴሳ ዞሬ

* 3:17 1ቆሮ 4:16፤ 11:1

1 ታ ኢንቴና ዶሲዛይቶ! ታ ኢንቴና ላሞቲዛይቶ! ታስ ኡፋይሲኔ አሶ ዛወዴ ጊዲዳ ታ ኢሻቶ! ጎዳን ሚኒ ኡቂቴ።

2 ኢንቴ ቆፋይ ጎዳን ኢሲኖ ጊዳና ማላ ኤዎዲያኔ ሲንጻኬይ ባ ጋርሳን ሲቂታና ማላ ታ ኢስታ ዎሳይስ። 3 ኤሮ! ኔኖ! ታናራ ኢሲፌ አማኔቲዳ አሳንቻዞ። ሚሺራቾ ቃላ ዮቶስ ታናራኔ ቃላሜንዎሳራ ቃሴካ ኢስታ ሱንላይ ዴዎ ማጻፌን ጻፌቲዳ ሃንኮ ታናራ አሶ ላጌታራ ኢሲፌ ዋዩዳይታ ሄ ማጫሳታ ኔ ማዳና ማላ ታ ኔና ዎሳይስ።

4 አይ ዎዴካ ጎዳን ኡፋይቲቴ። ቃሴካ ታ ኢንቴና ኡፋይቲቴ ታይስ። 5 ኢንቴ ከያቴሲ አሳ ኡባ አቻን ኤሬቶ። ጎዳይ ያና ማቲዴስ። 6 ሃኒዛ ዮዎን ኡባን ጋላታን። ዎሳኒኔ ጋናቴሳን ዎሳ ሲንሲ ሸቂቴ አቲን አይ ሚሻንካ ሂርጎፍቴ።

7 አሳ ቆፋፔ ቦላራ ዲዛ ዎሳ ሳሮቴሲ ኢንቴ ዎዝናኔ ኢንቴ ቆፋ ወርሲ ዩሱስ ኪርስቶሳን ናጌስ።

8 ወርሴሳ ቦላ ታ ኢሻቶ! ቱሙ ጊዲዳ ዮዎ ወርሲ፣ ቦንቾ ጊዲዳ ዮዎ ወርሲ፣ አዳ ጊዲዳ ዮዎ ወርሲ፣ ጌሺ ጊዲዳ ዮዎ ወርሲ፣ ዶሴቲዳ ሚሺ ወርሲ፣ ሎዎ ጊዲዳ ዮዎ ወርሲ፣ ሎጌቴሲ ጊዲንካ ጋላታካ ሃይታንታ ሚሳቲዛዝ ወርሲ ቆፒቴ።

9 ኢንቴ ታፔ ታማሪዳይሳ ዎይኮ ኢንቴ ታፔ ኤኪዳይሳኔ ሲዩዳይሳ ዎይኮ ቤዳይሳ አይ ጊዲኮካ ወርሲ አሲቴ። ጎዳይ ኢንቴናራ ጊዳና።

ጳውሎሲ ማዳዳይታስ ሺሺዳ ጋላታ

10 ዳሮ ዎዴፔ ጉዩ አራሳ ቆፋራ ኢንቴ ታ ጊሽ ቆፎ አይኪዴታ። ሄሲካ ጎዳ ባጋራ ታና ኬሂ ኡፋይሴስ። ቱሙካ ኢንቴ ታስ ቆፎ አጊቤይኬታሺን ኢንቴ ቆፒዳ ማላ አሳናስ ኢንቴስ ሃኖ ኢዲዴስ። 11 ታኒ ሄሳ ጊዛይ ታና ሜቲዳ ጊሽ ጊዴና። ጋሶይካ ታ አይ ሃኒኮካ “ዲዛይሲ ታስ ጊዳና” ጉስ ታማራዲስ። 12 ፓጩካ ታ ኤራይስ፤ ዴማዳካ ኤራይስ፤ ታ ጋፋዳካ፣ ካላዳካ ኤራይስ፤ ዲንካ ጳዩንካ ኤራይስ፤ አይ ጊዲኮካ ታስ ዲዛይ ታስ ጊዳና ጉሳ ፁራ ታ ሎዴሳ ኤራይስ። 13 ታስ ዎልቃ ኢሚዛ ኪርስቶሳን ታኒ ኡባ ሚሼ አሳናስ ዳንዳይስ።

14 ጊዲኮካ ኢንቴ ታና ታ ዋዩን ማዲዳ ጊሽ ሎዎ አሲዴታ።

15 ኢንቴ ፕሊጲስቶስ አሳቲ ሄሳፌ ቦላራ ኢንቴ ኤሪዛይ ኮይሮ ሚሺራቾ ቃላ ኢንቴ ኤኪዳ ዎዴ ታኒ ማቂዶኒያፔ ዴንዳሼ ኢንቴፌ አቲን ጌዴ ኢሚዲካ ሃ ኤኪዲካ ማዴቲዲኔ ማዲዲ ጊዛ ዎሳ ኬሲ ታስ ዴና። * 16 ሃራይ አቶ ሺን ታ ካሴ ታሶሎንቄን ዲዛ ዎዴካ ታኒ ሜቶቲን ኢንቴ ዛሪ ዛሪ ታስ ማዶ ዩዲዴታ።

* 4:15 2ቆሮ 11:9

17 ታ ሄሳ ጊዛይ ኢሚዳ ጊሽ ኢንቴስ አንጂይ ዳራና ማላ ጋዳ አቲን ታ ኢንቴፌ ማዶ ኤካናስ አሞታዳ ጊደና።

18 ታስ ኮሺዛይሳኔ ታና ኮሺዛይሳፌካ ቦላራ ኤካዲስ። ኢንቴ ታስ ዩዲዳ ማዶ ሚሻ አፍሮዲያ ኩሼፕ ኤኪን ታ ፓጩይ ኩሚደስ። ሃይሲ ዳሮፕ ያሳ አቻን ኤኬቲዳ ዳሮ ሎያ ሳዊዛ ያርሾ ማላ። * 19 ያሲ ባ ዱሬቴሳ ጊና ኢንቴና ኮሺዛይሳ ጎዳ ዩሱስ ኪርስቶሳ ባጋራ ኢንቴስ ኩንሳና። 20 ኑ አዋሲኔ ኑ ያሳስ ሜርናፕ ሜርናስ ቦንቾይ ጊዶ። አሚን።

ዉርሴሳ ሳሮካ

21 አማኒዛ አሳ ኡባ ዩሱስ ኪርስቶሳ ሱንሳን ሳሮ ጊቴ። ታናራ ዲዛ ኢሻቲ ዉሪካ ኢንቴና ሳሮ ጌቴስ። 22 አማኒዛይቲ ዉሪ ሃራፕካ ቄሳሬሶ አሳፕ አማኒዛይቲ ዉሪካ ኢንቴና ሳሮ ጌቴስ።

23 ጎዳ ዩሱስ ኪርስቶሳ አዶ ኪያቴሲ ኢንቴናራ ጊዶ። አሚን።

* 4:18 ኪሳ 29:18

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
